

Premier Mike Eman a reuni cu autoridadnan di Riohacha



ORANJESTAD- Prome minister Mike Eman a sali den fin di siman pa Colombia. E bishita aki ta pa atende diferente reunion na Bogota y tambe na Riohacha.

Diasabra merdia a yega Riohacha na aeropuerto Almirante Padillas. Aki el a wordo ricibi pa e autoridadnan di Riohacha. Cu tur seguridad prome minister a yega hotel y mesora el a topa cu un indigena Wayuu. Aki ta trata di Iris Aguilar un di esnan mas conoci den loka ta arte na Riohacha.

Mesora el a cuminsa e prome encuentronan na Riohacha cu alcalde y demas representantenan di gobierno di Guajira. Hunto cu prome minister tabata tey embahadora di Hulanda Marion Kappeyne staciona na Bogota cu a acompaña prome minister for di su yegada na Bogota y a sigui cune tambe pa Riohacha.

Mirando cu e bishita na Riohacha tin di haber cu un tiki di historia di Aruba su antepasadonan indigena, tabata tey den e bishita di trabao dos miembro di Museo Arqueologico di Aruba. Aki ta trata di Arminda Ruiz Franken directora di Museo Nacional y tambe Arqueologo Harold Kelly cu tin un pasion pa su trabao. E hoben aki tin un interes increible pa sigui busca mas di loka ta Aruba su historia. Tabata tin un almuerzo despues di e yegada na Riohacha na La Guajira. Jaider Curiel, Choles Alcalde di Riohacha a hiba algun palabra masha bunita. Tambe Wilder Guerra Director di Banco de La Republica a hiba prome minister na nan biblioteca y splica con nan ta funciona manteniendo e contacto y guia pa e indigenanan pa loka ta e cultura.

Semper y cuando tur esnan na La Guajira no ta lubida e amistad cu a existi pa varios decada.



Un amistad cu a bai perdi despues cu no tabata tin vuelo directo mas entre Aruba y cierto parti di Colombia. Awor Tiara Air ta treciendo e amistad familiar aki bek. Ademas e Visa pa Aruba ta algo cu tambe a mengua e cantidad di Colombiano cu ta bin Aruba.

Algun tempo pasa entre embahada Hulandes y gobierno di Aruba a logra flexibiliza e forma di haya Visa. E mercado Colombiano ta di hopi importancia pa Aruba tambe pasobra e turistanan procedente di Colombia ta gasta bon den Aruba su economia. □